

Headlines

1. जम्मू-कश्मीर विधानसभा दे अज्जै थमां श्रीनगर च शुरु होए दे इजलास दरान साबका गवर्नर सत्यपाल मलिक हुं'दे सने हाल च पूरे होए दे साबका मिम्बरें गी शरदांजलि भेंट कीती गई।
2. प्रधानमंत्री नरेन्द्र मोदी होरें आखेआ ऐ जे ओहू इस म्हीने की 26 तरीक गी आसियान शिखर सम्मेलन च वर्चुअल ढंगै'नै हिस्सा लैडन।
3. भारत ने पाकिस्तान पर त्रिक्खा ज़बानी हमला करदे होई आखेआ ऐ जे इस्लामाबाद आसेआ समर्थित पहलगाम आतंकवादी हमला दुनिया गी म्हेशां चेत्ता रौहग ते आतंकवाद दा प्रायोजक मुख्य पाकिस्तान, मनुक्खी अधिकारें दी सबनें शा बड़ी उल्लंघना करने आहले मुख्य दे रूप च बेनकाब होई गेआ ऐ।
4. केन्द्र शासित प्रदेश जम्मू-कश्मीर राश्ट्री युवा उत्सव, विकसित भारत युवा नेता संवाद च बेह्तरनीन प्रदर्शन लेई पूरी चाल्ली तैयार ऐ।

<><><><><><>

Autum-Session LA

जम्मू-कश्मीर विधानसभा दा पतझड़ आहला इजलास अज्ज श्रीनगर च शुरु होआ। अज्ज पैहले ध्याड़े हाल च पूरे होए दे साबका मिम्बरें गी शरदांजलि भेंट कीती गई। इजलास दे शुरु च गै स्पीकर अब्दुल रहीम राथर होरें दिवगंत नेताएं प्रति श्रद्धांजलि भेंट करदे होई उं'दा जिक्र कीता- जि'नें जम्मू-कश्मीर सनें राश्ट्र लेई चेचा योगदान दित्ते दा ऐ। जेह्डी प्रमुख हस्तियें गी अज्ज सदन च चेता कीता गेआ उं'दे च जम्मू-कश्मीर दे साबका गवर्नर सत्यपाल मलिक, साबका मंत्री गुलचैन सिंह चाढ़क, साबका विधायक दीनानाथ भगत, साबका एम.एल.सी. गुलाम नबी शाहीन, रमेश अरोड़ा ते सरदार मोहम्मद अखलाक खान मुख्तार पर शामिल हे। स्पीकर होरें उं'नेंगी लोकतांत्रिक कदरें गी बरकरार रखदे होई जम्मू-कश्मीर दे हितै लेई कम्म करने आहला नेता करार दिं'दे होई उं'दी निश्ठा, सेवाभाव ते योगदान गी चेता कीता। सत्ताधारी ते बरोधी

धड़े दे मिम्बरें उ'नेंगी भावें-भरोची शरदांजलि भेंट कीती। स्पीकर होरें इ'नें नेताएं दे परोआर आहलें कन्नै बी हमदर्दी प्रगट कीती। विधानसभा दे इस-केहड़े इजलास दी कारवाई 6एं होर दिनें धोड़ी चलोग जिस दरान केन्द्र शासत प्रदेश दे विकास ते जनहित दे मुद्दे पर कम्में-कारवाइयें गी तोड़ चाढ़ेया जाहग। 9वें दिनें दा एहू इजलास औंदी 31 अक्तूबर गी खत्म होग।

<><><><><><>

NC-Whip

सत्ताधारी पार्टी नेशनल कांफ्रेंस नै अपने सभनें विधायकें गी व्हिप जारी करियै एहू निर्देश दित्ता ऐ जे ओहू जम्मू-कश्मीर थमां राज्यसभा दिएं 4 सीटें लेई होने आहले चुनांऽ च पार्टी मेदवारें दे हक्कै च वोट देने लेई असैम्बली च हाजिर रौहना। राज्यसभा दिएं इ'नें सीटें लेई मतदान औंदे शुक्रवारें होग। नेशनल कांफ्रेंस दे चीफ व्हिप मुबारक गुल होरें पार्टी धियकें गी व्हिप जारी कीता ऐ जेह्दे च उ'नेंगी निर्देश दित्ता गेआ ऐ जे ओहू चुनांऽ आहले ध्याड़े असैम्बली च जाहिर रौहना ते पाटीर दे निर्देशें मुजब गै मतदान करना। नेशनल कांफ्रेंस नै राज्यसभा दी एक्कड़ी चौनें सीटें लेई मेदवार खड़ेरे दे न जिसले के बीजेपी नै 3 मेदवारें दे नाएं दा ऐलान कीते दा ऐ।

<><><><><><>

PM-ASEAN

प्रधानमंत्री नरेन्द्र मोदी होरें आखेआ ऐ जे ओहू इस म्हीने की 26 तरीक को आसियान शिखर सम्मेलन च वर्चुअल ढंगै'नै हिस्सा लैडन। सोशल मीडिया दी इक पोस्ट च श्री मोदी होरें आखेआ ऐ जे उ'नें मलेशिया आसेआ आसियान दी अध्यक्षता ग्रैल्ल करने पर मलेशिया दे प्रधानमंत्री अनवर इब्राहिम होरें'गी बधाई दित्ती। श्री मोदी होरें उ'नेंगी औंदे शिखर सम्मेलन दी कामयाब मेजबानी लेई शुभकामनां बी दित्तिआं ते आसियान-भारत व्यापक कार्यनीतिक भागीदारी बधाने दी वचनबद्धता दोहराई। 47में आसियान शिखर सम्मेलन दा आयोजन इस म्हीने की 26 थमां 28 तरीक तगर मलेशिया दे कुआलालम्पुर च कीता जा'रदा ऐ।

<><><><><><>

PM-Article

प्रधानमंत्री नरेंद्र मोदी होरें अज्ज आखेआ ऐ जे देसै दे ज्हाज निर्माण ते समुंद्री तंत्र च नमें सिरेआ जान भरने लेई सरकार दा 8 अरब अमरीकी डालरें दा पैकेज कोई आम बजट नेई सगुआं महत्वकांक्षा दी सारत ऐ। बंदरगाहें, ज्हाजरानी ते जलमार्गें सरबंधी केंद्री मंत्री सर्बानंद सोनोवाल हुंदे आसेआ पोस्ट कीते गेदे इक लेख गी सांझा करदे होई प्रधानमंत्री होरें आखेआ जे एहू लेख दस्सदा ऐ जे कि'आं मेक इन इंडिया अभियान दे प्रोत्साहन ते बंदरगाहें दे आधुनिकरण दे जत्तें कन्नै देसै गी इक अनोखा लाहू हासल होआ करदा ऐ। सोशल मीडिया पोस्टें दी इक श्रृंखला च प्रधानमंत्री होरें इस गल्ले पर लोऽ पाई जे कि'आं अगली पीढ़ी दे जी.एस.टी सुधारें देसै दे आर्थिक आत्मविश्वास गी बढ़ावा दित्ता ऐ। उ'नें आखेआ जे इस माली ब'रे च अजें तगर भारती आटो निर्यात बी रिकार्ड 31 लक्ख 40 ज्हार इकाई तगर पुज्जी गेआ ऐ।

<><><><><><>

Bhai-Dooj

जम्मू-कश्मीर च बी अज्ज भाई दूज यानि भैने-भ्राएं दे प्यार दा प्रतीक त्यौहार मनाया जा'रदा ऐ। इसी डुग्गी संस्कृति च टिक्के जां फी वीर टिक्के दे नांऽ कन्नै बी जानेआ जंदा ऐ। भैना अज्जै दे दिनै भ्राएं गी टिक्का लांदियां न ते उंदी लम्मी उमर, उंदी खुशहाली ते समृद्धि दी कामना करदियां न ते भ्रा बी अपनी भैनें गी उंदी हिफाजत ते जीवन भर उंदा साथ देने दा बचन दिंदे न। केई सारे लोकें मंदर च जाइए मत्था बी टेकेआ। लोकें सभनें दी खुशहाली, समृद्धि ते आपसी भाईचारे दी कामना कीती।

<><><><><><>

DC Samba Meet

सांबा दिएं डिप्टी कमिशनर आयूषी सूदन होरें जिले च प्रधानमंत्री उज्जवला योजना दे त्रीये चरण दी अमल-आवरी दा जायजा लैने ते इस प्रक्रिया गी चुस्त-दुरुस्त बनाने लेई अज्ज जिला उज्जवला कमेटी दी इक बैठक लाई। बक्ख-बक्ख सरबंधत मैहकमें दे अधिकारिएं इस बैठका च हिस्सा लैता। साढे जिला संवाददाता सतपाल शर्मा मूजब, डिप्टी कमिशनर होरें प्रधानमंत्री उज्जवला योजना तैहत एलपीजी दे कनैक्शन जारी करने दे कम्मै च तेजी आहनने लेई मैहकमें बश्कार तालमेल दे कन्नो-कन्नो कम्में च पारदर्शिता ते जोआबदेही दी जरूरतै पर बी जोर पाया।

उ'नें सबनें सरबंघत विभागें गी निर्देश दित्ता जे ओहू तय दिशा-निर्देशें मूजब, कनैक्शनें दी बेल्ले सिर जांच जकीनी बनान। डिप्टी कमिशनर होरें इस कम्मै च हासल प्रगति दी नियमित समीक्ष करने दे बी निर्देश दित्ते जे हर इक सरबंघत विभाग गी आखेआ जे ओहू इस सरबंघै च जांच रिपोर्टां बेल्ले सिर जमा करोआन तांजे इस गल्लै गी पक्का कीता जा जे कोई बी योग्य लाभार्थी, इस योजना दे लाहू शा खुंजी नेई जा।

<><><><><><>

India-Pak UN

भारत ने पाकिस्तान पर त्रिक्खा ज़बानी हमला करदे होई आखेआ ऐ जे इस्लामाबाद आसेआ समर्थित पहलगाम आतंकवादी हमला दुनिया गी म्हेशां चेत्ता रौहग ते आतंकवाद दा प्रायोजक मुख पाकिस्तान, मनुक्खी अधिकारें दी सबनें शा बड्डी उल्लंघना करने आहले मुख दे रूप च बेनकाब होई गेआ ऐ। भारत दे संयुक्त राष्ट्र मिशन दे प्रथम सचिव रघु पुरी होरें आखेआ ऐ जे आलमी बिरादरी, भारत दे खलाफ पाकिस्तानी नीति उपकरण दे रूप च आतंकवाद दे इस्तेमाल दी गवाह ऐ। श्री पुरी होरें महासभा दी मनुक्खी मामलें कन्नै सरबंघत त्रीऽ समिति च संवाद दे दरान ऑपरेशन सिंदूर गी प्रासंगिक करार दित्ता। उ'नें वैश्विक आतंकवाद दे केंद्र-पाकिस्तान गी अपने गिरेबान च झांकने दी सलाहू दित्ती ते आखेआ जे ओहू अपने बन्नें दे अंदर बन्नैं दी सुरक्षा लेई गैहू पुट्टे ते बन्ने पार महिलाएं ते बन्नैं गी नशाना बनाना बंद करै।

<><><><><><>

Prez. VB

राष्ट्रपति द्रौपदी मुर्मू होरें विकसित भारत दे नजरिए गी साकार करने आस्तै समाज दे हर वर्ग, खास करी सभनें थमां कमजोर ते हाशिए पर रवा'रदे वर्ग आस्तै बरोबर मौके उपलब्ध करोआने दी जरूरता पर जोर पाया। ओहू अज्ज केरल दे राजभवन च साबका राष्ट्रपति के.आर नारायणन हुं'दी मूर्ति थमां पर्दा गोआइने मगरा उत्थे मौजूद लोकें गी संबोधित करा'रदियां हियां। साबका राष्ट्रपति के.आर नारायणन हुंदे योगदान पर लौऽ पांदे होई राष्ट्रपति होरें आखेआ जे श्री नारायणन होरें अपना जीवन राष्ट्र निर्माण ते इक समावेशी मुख दे निर्माण आस्तै समर्पित करी दित्ता। केरल दे गवर्नर होरें राष्ट्रपति मुर्मू ते साबका राष्ट्रपति रामनाथ कोविंद होरें'गी सम्मानित कीता।

COP-10 IND

भारत गी खेड्डें च डोपिंग खलाफ अंतराष्ट्री सम्मेलन लेई पार्टियों दे सम्मेलन - कॉप10 ब्यूरो दा परतियै उप-अध्यक्ष चुनेआ गेआ ऐ। एहू फैसला पेरिस च आयोजित कॉप10 दे 10में इजलास दे दरान लैता गेआ। युवा मामलें ते खेड्डें सरबन्धी मंत्रालय ने इक बयान च आखेआ ऐ जे सम्मेलन दे दरान, भारत ने डोपिंग रोधी सम्मेलन गी प्रदर्शित करने लेई इंटरैक्टिव बोर्ड दी सुविधा प्रदान कीती ऐ। मंत्रालय ने आखेआ जे सम्मेलन च खेड्डें दे प्रशासन गी मजबूत करने ते डोपिंग उन्मूलन कोश लेई रपे-पैसे दी बवस्था करने सने होरनें विशें पर बी चर्चा कीती गेई। सम्मेलन च डोपिंग रोधी सम्मेलन दी 20मीं ब'रेगंड बी मनाई गेई, जेहड़ा कनूनी रूप कन्नै आलमी सतह दा इक संगठन ऐ।

<><><><><><>

JK-NYF

जम्मू-कश्मीर राश्ट्री युवा उत्सव विकसित भारत युवा नेता संवाद च बेहतरीन प्रदर्शन लेई पूरी चाल्ली तैयार ऐ। युवा सेवा ते खेड्डें सरबन्धी निदेशालय नै केंद्र शासित प्रदेश च केई सारे अभियान रम्भे तां जे युवाएं दे हुनर निखारेआ जाई सके ते उनेंगी सशक्त बनाइये राश्ट्र सतह दे इस आयोजन लेई तैयार कीता जाई सकै। इनें कार्यक्रमें च चित्रकारी, लोक गीत, कहानी ते कविता लिखना, नमियां काहडां ते सरबन्धी होर गतिविधियां शामिल न। युवा सेवा ते खेड्डें सरबन्धी मैहकमे दी महानिदेशक अनुराधा गुप्ता होरें सारे जिलें दे युवाएं गी बहोबद्द गिनतरी च शामिल होने लेई आखेआ। उनें सभनें गी My bharat portal <https://mybharat.gov.in> पर पंजीकरण करोआने लेई आखेआ।

<><><><><><>

JK-BOSE

जम्मू-कश्मीर स्कूली शिक्षा बोर्ड नै कश्मीरी भाशा दी किताबें दी उपलब्धता नेई होने बारै आवा'रदिएं खबरें दा खंडन कीता। इक बयानै च जम्मू-कश्मीर स्कूली शिक्षा बोर्ड नै इस बारै च स्पष्टिकरण दित्ता ऐ जे मौजूदा सत्र लेई लोडचदी मात्रा च कताबां उपलब्ध न। बोर्ड मुजब 3 लख 85 ज्हार पाठ्य पुस्तकें गी छापेआ ते प्रकाकिश कीता गेआ। एहू कताबां पैहली थमां 8मीं

जमात तोड़ी लेई हियां। मौजूदा शैक्षणिक बरे लेई इक लक्ख 40 जहार कताबें गी उपलब्ध
करोआया गेआ ऐ।

<><><><><><>